

022 阿母个笑容 // 陳意超 演說 -- 黃美慈 整理 (04/07thk 改寫)

有人講：「『蒙娜麗莎』的文文仔笑，迷人閣kài高尚。」毋知逐（tāk）家意見如何？啊若我的看法是，阮阿母的笑容是通世界上kài美麗--的。阮阿母性地好閣有度量，毋管人按怎ka偏（phinn），伊永遠笑笑--仔，攏袂受氣。厝邊隔壁攏講阮阿母就親像醉彌勒全款，足有量的。阮阿母人非常樂觀，若（ná）像攏毋知影煩惱是啥乜（mih）？閣較濟（tsē）的空課（khang-khuè），閣較困難的問題，伊一定是歡歡喜喜來ka看待。伊定定咧講：「食苦若（ná）食補。做人啊！毋通怨天怨地。艱苦嘛是一世人，歡喜嘛是一世人，笑笑--仔較好過日--啦！」

有tang時仔看著我，因為隔日欲考試，煩惱kah憂頭結面，這個時陣，伊就叫我起去眠床反（píng）死狗仔栽。阿母講：「共（kā）頭殼內的物件tshik-tshik--咧，按呢記較會牢（tiâu）。」這個時陣，我就會peh起去眠床頂，反予阿母看，阿母就笑kah軟腰，目睷sa-bui仔sa-bui。

阿母看逐項代誌攏足有趣味，伊拄著人，不管是熟似抑（iah）是生份，一定是笑面相款待。阮阿爸講：「當初，就是因為恰意阿母的笑容，毋才會拚命jiok來做某。」聽著阿爸講按呢，阿母是面仔紅紅，笑kah若玫瑰花咧開全款。阮厝內面阿母若有佇--咧，阮就有笑容通好看。

我的成績，一向是普通普通，有tang時仔吊車尾，家己看著嘛歹勢。毋閣，阿母攏毋捌（bat）因為我考bái，就予我食膨餅（phòng-piánn），伊講冊認真讀就好--矣，讀無嘛無要緊，人講：「一枝草一點露，一人gâu一步，天公總--是會予咱路行。」雖然阿母按呢講，毋閣我知影，我若是有好成績，伊一定會足歡喜--的。所以我偷改分數，得著第七名，彼工轉--去，共阿母報告好消息，真奇怪，阿母無笑容，顛倒予我食膨餅。原來老師早就發現--矣，先我一步，敲電話予阿母。我只有頭犁犁老實承認毋著。阿母kan-na輕輕仔講：「知影毋著，後改就毋通按呢。」我才徹底覺悟講人愛跔（kha）踏實地才是正路，靠家己拍拚得著成功，阿母才有笑容。

（約600字）